

ACIPS organizovao javnu diskusiju: „Popis stanovništa u Bosni i Hercegovini 2013. godine“ i promociju magazina "Novi pogledi"

[PRINT](#)

Ponedjeljak, 25. JUNI 2012. 15:14



ACIPS je u ponedjeljak, 25. juna 2012. godine organizovao javnu diskusiju na temu „Popis stanovništva u Bosni i Hercegovini 2013. godine“. Tom prilikom je promovisan i novi broj ACIPS-ovog časopisa „Novi pogledi“ u kojem je ova tema osvijetljena s različitih aspekata.

ACIPS smatra da je punopravn i transparentan proces popisa stanovništva od iznimne važnosti, budući da je ovo prvi popis stanovništva u BiH od 1991. godine u kojem će naša zemlja dobiti konkretne podatke o broju stanovnika, nivou obrazovanosti stanovništva, ekonomskom stanju i životnim uslovima. Od ovih pokazatelja direktno ovisi budući razvoj zemlje. Tokom diskusije su tematizovana pitanja vezana za sadržaj popisivačkih listića za lica, tehnički aspekt implementacije popisa, finansiranje popisa i mogućnosti sprečavanja potencijalnih nedostataka ovog procesa.

Zdenko Milinović, direktor Agencije za statistiku Bosne i Hercegovine, rekao je da je bespredmetno naglašavati važnost popisa za Bosnu i Hercegovinu, obzirom da bez popisa nema ni evropskih integracija Bosne i Hercegovine ni mogućnosti korištenja EU fondova, kao ni razvojnih ni socijalnih politika za Bosnu i Hercegovinu. Što se tiče potencijalnih nedostataka procesa sprovođenja cenzusa, kao i popisnice za lica, gospodin Milinović je naglasio da će se sve što se pokaže kao neispravno nakon probnog popisa koji će se održati u septembru 2012. godine, moći izmijeniti do popisa u aprilu 2013. godine.

Mary-Ann Hennessey, šefica Ureda Vijeća Evrope u Bosni i Hercegovini, je predstavila ulogu Vijeća Evrope kao jedne od članica Međunarodne misije za monitoring popisa u Bosni i Hercegovini i naglasila važnost održavanja popisa na najtransparentniji i inkluzivniji mogući način. Ova Misija će redovno posjećivati BiH sve do popisa, a tokom samog popisa će nadzirati popisivače. Gospođa Mary-Ann Hennessey je također istakla značaj popisa za planiranje stranih i javnih investicija u Bosni i Hercegovini.

Alen Tatić, predstavnik Inicijative za slobodu izjašnjavanja, je izrazio zabrinutost što je priprema nacrta i usvajanje Zakona o popisu stanovništva, domaćinstava i stanova u BiH protekla bez konsultacija sa javnošću i bez uključenosti civilnog društva. Dalje, izrazio je zabrinutost formulacijom pitanja 23, 24 i 25 koja se odnose na etno/nacionalno, religijsko i jezičko izjašnjavanje. Također je naglasio da je Inicijativa za slobodu izjašnjavanja spremna lobirati i sprovesti zagovaračku kampanju u cilju izmjene popisnice.

Anes Makul, glavni i odgovorni urednik „Novih pogleda“ i predstavnik ACIPS-a je ukratko prezentirao 19. broj ACIPS-ovog magazina „Novih pogledi“ koji je tematski posvećen temi popisa stanovništva, domaćinstava i stanova u BiH i koji ovu temu analizira s aspekata ekonomije, ljudskih prava i politike.

[< <](#) [> >](#)